

Mud Volapüka

Nüm 65

14 yulul 2017

Bukemaboed

Fövot lekoned-mära yutopik
„Ventürs hiel ‚Nenolikan‘ e flenas omik“
fa hiel „N. N. Nosov“

Kapit deglulid. Pö malädanöp.

E=fi=nikölo lü yan, Nifaflogül etirof gleipädi klok=il=ä. Toenod etonon:
„Dzin-dzin!“. Yan pemaifükon. Ji=kälan lenlabü mäned sananik vietik e kapa=stofäd, disao kel herakrugüls goldöfik äsüdranons [äsestegons], epubof pö nügölöp.

„Ag, o Söl!“ - evokädo ed enokof palmis okik ta ods dredäliko -
„Edugoy malädani nog bal! Spad gebidik ad lasumön [ini malädanöp] ya no dabinon! Kiöpo tuvors onis! Ünü yel lölik malädanöp ävagon [ästadon vagiku]: nek ävilon pa=lekälön; ab adelo ya malädan deglulid!“

„Hicilil at leno malädom“ - Nifaflogül egesagof. - „Elükömom ad visitön flenis.“

„Üfo, nügolorsös.“

Jicilils e Nenolikan enükömons ini cem sanana. Pulmonar äseadof len tab ed äpenof bosu. Kum gretik sanava=kadas, ini kels maläds malädanas papenons, äseaton fo om. Eküpölo Nifaflogüli e Jiblövalogikani, esagof:

„Bo, elükömors-li ad küpedön [visitön] malädanis? Nö, no mögos! No demors, das malädans neodons takädi. Ab or, o Jiblövalogikan,



ya labor mäplati pö flom? Benovipob! Äbüo>sagob atosi ore. Ga sevob, das töbo hicilil nemu bal süikom pö dom, täno ospetöfoyös ad blütotis e bölis.“

„Leno vilobs küpedön malädanis“ - Nifaflogül egesagof. - „Hicilil at: kompenan omsik< vilom visitön malädanis.“

„Ibüdob hicilile at ad seatön in bed, ab ilöädöm nen däl sanana e, vio logob, ya iprimom ad feitön. No kanob leadön dudranön omi. Malädanöp no binon topu ad feitön.“

„Ab ga leno ofeitob.“ - Nenolikan egesagom.

„Nö, nö!“ - Pulmonar evokädof seväriko [fefiko] ed änoidülof me rüdil boadik okik len tab. - „Hicilils ai sagoms: ‚No ofeitob‘, ab poso ga feitoms.“

Äniludölo, das bespikot ko Nenolikan efinikon, Pulmonar elüflekof oki Jiblövalogikane:

„Dajonorös flomi orik obe, o löfikan.“

Esekleibof mäplati ed eprimof ad lelogön flomi Jiblövalogikana.

„No fovo [plu] neodor mäplati“ - Pulmonar esagof, efiduinölo dalogami. - „Golorör kobü ob, o löfikan, ovamükobs flomi orik me lit blövik [lütramaren] e blütot unepubon.“

Edegolof kobü Jiblövalogikan se cem. Nenolikan eküpom mänedi sanavik vietik e kapüti [tipotahäti] pö klotilägöm. No lunüpo ätikölo, ezüükom mänedi at, elenükom kapüti sui kap, poso elenükom lünis sui nud, keli Pulmonar eblibükof su tab, ed, esumölo rüdili boadik se tab, esegolom se cem. Nifaflogül älogedof Nenolikani stunidiko, ästunölo demü bold e datuväl omiks.

Edugolölo ve luyal [dugolöp], emaifükom yani ed ereafom malädanacemi, kü lövikans: flens omik< äseatoms. Enilikölo lü bed balid, eküpom, das Murülan äseatom su on. Loged Murülana äbinon saäbäliku e faviku.

„Lio saun ora stadon-li, o malädan?“ - Nenolikan esäkom, steifölo ad sagön me vog no okik.

„Legudiko“ - Murülan egesagom e pö atos elogodajästom so, äsif

äprimikom ad deadön pos minuts lul [pos brefüp].

„Löädoröd, o malädan“ - Nenolikan ebüdom.

Murülan no vilöfo elöseidom oki sui bed, ed älogetom fagio. Nenolikan efimaseitom [epladom] rüdili boadik sui blöt omik ed esagom:

„Natemoröd.“

„Maleditö!“ - Murülan emurom. - „Nü ‚löädoröd‘, tän ‚seitoröd oki‘, tän ‚natemoröd‘, tän ‚no natemoröd‘!“

Nenolikan nevemiko eflapom etani me rüdil len kap ed esagom:

„Ol, o Murülan, leno ecenol. Murol kösömo.“

Murülan stuniko elogedom lü om:

„Nenolikan!“

„Sö!“ - Nenolikan äsijidom [ävisipom] etane.

„Yufolös obi ad skeapön isao, o Nenolikan“ - Murülan ävisipom. - „Binob go sauniku! Iblütob kieni, kel nu ti no dolon, ab stöpädoy obi pö bed, no degivoy klotemi. No plu kanob sufälön! Ga vilob spatön. Suemol-li?“

Murülan egleipom Nenolikani len sliv e no ävilom sägleipön omi.

„Rajanö!“ - Nenolikan egesagom. - „Osufodolöd nog no lunüpo, udatikob bosi. Te promolöd obe, das denu olobedol obi, ab if jicilils osäkofs oli: kin idatikon bäluni< tän ogesagolöd, das ob binob etanu.“

„Rajanö, rajanö!“ - Murülan änutom siölo. - „Te usteifolös!“

„No kudolös tefü atos“ -

Nenolikan ekredükom etani.

Enilikom lü bed fovik [sököl], su kel Pilulülan äseatom.

„O löfikan, savolös!“ -

Pilulülan ävisipom. -

„Fomälolös viovemo sufälöb! It älekälob votikanis ünü lif lölik, ab nu lekälöy obi.“



„Ab binol malädanu, no vo-li üfo?“

„Leno binob malädanu! Te blüt binon pö jot e krated dis nud. Leno nedos ad seatön [stadön] tö malädanöp demü atos.“

„Kikodo stöpädoys oli is?“

„Bi malädanöp onsi äbinon vagiku, nek ädabinon ad lekälön, ab etans vilons käledön malädani seimik. Ga binons jicililus! Ab ga kio lekälöfs! Fi! Fimaseitöfs mäplatis mielik plödo [plödü koap] e lonülofs mieli ad nino. Atos ga binon neverätiku: nedos ad yodina†tintur plödo, e kastor ninio. No baicedob ko lekäl somik!“

„Koo no baicedob“ - Baülan estetom de bed nilädik. - „Proibos ad golön, rönön e pledön fanapledi. Igo proibos ad kanitön. Idesumoys klotemi valikanes, igivoys nudasärvätüli valikanes. Muads balik: te seatön e snötön nudi.“

„Kikodo ätevols malädanöpio?“

„Bi ädelo isefalobs se bäset plödü zif ed iseitobs obis ad slipön. Delaprimo jicilils igalüköfs obis ed äsagöfs: ‚Kiöpao ikömors, o hicilils?‘. Ägesagöfs: ‚Äflitobs pö bälun ed idofalobs‘. - ‚Ag, idofalors! Ag, nedos ad lekälön oris! Ag, tevorsös lü malädanöp!‘ Klu ätevobs isio.“

„Kludo, nek malädon-li?“ - Nenolikan esäkom.

„Nö, te Glöbül balik malädom.“

Nenolikan elükömom lü Glöbül:

„Lio stadol-li?“

„Itu†blegükom lögi [itenükom löga†tani]. Leno kanob golön. Ab atos no muifükon obi. Bulül obik emoikon. Plidö!, otuvolös Bulüli! Bo, ut stodon seimöpo nilo is. Ga no kanob mufön [golön].“

„Rajanö“ - Nenolikan esagom. - „Datuvülob Bulüli olik, ab sagolöd valikanes, das idatikob bäluni.“

Nenolikan edalogom hicilils valik ed enunedom omis, dat etans osagoms, das om idatikom-la bäluni. Fino egekömom ini cem sanana. Nifaflogül ädastebedof omi.

„Lio malädans stadons-li?“ - esäkof.

„Etans leno binons malädanus!“ - Nenolikan esagom. - „Te Glöbül balik malädom bosilo.“

„Ulibüköys-la omis suno!“ - Nifaflogül efredikof. - „Sevor-li: kisi desinob? Ujenükobs baoli dinädü dönusaun malädanas. Obinos kiolefrediku!“

„Jinoy no desinön ad libükön etanis“ - Nenolikan egesagom.

Ettimo Pulmonar e Jiblövalogikan egekömofs.

„Kikodo ilenükör mänedi? Oknämät kion!“ - Pulmonar elüjutedof lü Nenolikan.

„Oknämät nonik dabinon“ - Nenolikan egesagom. - „Te äzügolom ad dalogam.“

„Ad kis dalogam orik isekon üfo?“ - Pulmonar esäkof kofetiko.

„Dalogam itüvon, das malädans valik plä balan binons sauniku, e ya mögos ad libükön onis.

„Nö, nö!“ - Pulmonar äsagof dredäliko. - „Fomälörös: kis ujenon ven ulibükobs hicilils degfol ottimo? Upemükoms zifi lölik! Glät nonik nätik uposblibon, valikans usufons blütotis e bölis. Diseinü büföf blütotas [ad büoneletön blütotis] mutobs blibükön hicililis pö malädanöp.“

„Ba, mögos-li ad libükön onis pianiko?“ - Jiblövalogikan esagof. - „If igo hicilili bal a del.“

„Balan a del binos defiku, nedos ad nemu a tel“ - Nifaflogül esagof. - „Vilobs jenükön baoli vifiküno.“

„Rajanö“ - Pulmonar esiof. - „Upenotobs lisedi e sis odel olibükobs malädanis balatiko.“

Nifaflogül äplodof ed ejutedof lü Pulmonar ad bradön ofi:



„Nö, telatiko, o löfikan, telatiko! Kio vemo vilob, das etans pulibükons go suno. Ga koo vilor-la kompenön pö baol. Ga danüdor so legudiko!“

„Rajanö, telato“ - Pulmonar esofikof. - „Uprimobsös libükön sis süenikünans. Sötor yufön obis“ - elüspikof Nenolikani. - „Kin bevü etans binon süenikünu?“

„Ga ols valik binons süeniku!“

„Ab leno kredoböv atosi. Hicilils no binons süeniku. Zesüdos ad datikön vobodi seimik pro etans, dat ojäfonsöv me on ed uglömonsöv dö dädükiälotis.“

„Täno ulibükobsös mastanis: Skrubül e Lebuonül. Onätükomsöv toodi nenzogiko“ - Jiblövalogikan esagof.

„Tiket gudik!“ - Pulmonar elobof. - „Ga primobsös [ad libükön] sis Skrubül e Lebuonül ats.“

Enüpenof Skrubüli e Lebuonüli sui papür.

„Po etans viloböv libükön Murülani“ - Pulmonar esagof. - „Binom so legagiku. Ai murom e böladom valikanis.“

„Nö, no nedos“ - Nenolikan edodom. - „Obinos gudikumo ad laiikipön Murülani tö malädanöp, dat usälärnikom ad murön.“

„Täno mögos ad libükön Pilulülani. Favom tefü malädanöp obsik ed ai krütom lekälametodis obsik. Malädan tupik kion! Vilöfo ulibükob omi.“

„Nö, koo no nedos ad libükön Pilulülani“ - Nenolikan egesagom. - „Älekälom votikanis ünü lif lölik, it polekälomös atna. Obinos gudikumo ad libükön Kölamarüdi. Binom pänanu gudik e vobod sunädo usüikon pro om. Binom tidäbu obik. Ibetidob omi ad pänön.“

„Vo, o löfikan!“ - Nifaflogül älebegof. - „Mögos-li ad libükön Kölamarüdi adelo? Ubegob ome ad pänön pöträti oba.“

„E Lüri“ - Nenolikan eläükom. - „Koo binom tidäbu obik. Ibetidob omi ad musigön me flut.“

Nifaflogül dönu ejutedof ad bradön Pulmonari:

„Ulibükobsös Kölamarüdi e Lüri! Plidö!“

„Rajanö, upläobs kol oms“ - Pulmonar esiof. - „Ab olibükobs retikanis ma leod.“

Fino lised pefomon. Pulmonar ebüedom givön klotemi Kölamarüde e Lüre de stokacem. Pos minuts anik oms bofik lefredik enükömoms ini cem ofik.

„Libükobs oris“ - Pulmonar esagof omes. - „Steiforsös ad bitön gudiko, voto omutobs dönu blinön oris ini malädanöp.“

Reidolsös fövoti konota pö nüm fovik.